

শিক্ষা ব্যবস্থায় কর্পোরেট সংস্কৃতি : টেকসই উন্নয়নে এ যেন এক অশনি সংকেত

মুহাম্মদ জসীম উদ্দীন

সহকারী অধ্যাপক, অর্থনীতি বিভাগ

সিলেট ক্যাডেট কলেজ, সিলেট

মোবাইল : +৮৮০১৭১২-৬১৩০৯৭

e-mail : jasim_uddin90@yahoo.com

শিক্ষা ব্যবস্থায় কর্পোরেট সংস্কৃতি : টেকসই উন্নয়নে এ যেন এক অশনি সংকেত

সার-সংক্ষেপ

আলোচ্য প্রবন্ধে আমাদের দেশের টেকসই উন্নয়নের পথে একটি মৌলিক বাঁধা হিসেবে শিক্ষা ক্ষেত্রে কর্পোরেট সংস্কৃতি প্রতিষ্ঠার ওপর আলোকপাত করা হয়েছে। প্রবন্ধের শুরুতে লক্ষ্য ও উদ্দেশ্য এবং তথ্য ও পদ্ধতি সম্পর্কে আলোচনা করা হয়েছে। শিক্ষা যেমন উন্নয়নের প্রধান হাতিয়ার হিসেবে পরিগণিত তেমনি শিক্ষা ক্ষেত্রে গলদ উন্নয়নের পথে প্রতিবন্ধকতা তৈরী করে। এ বিষয়ে শিক্ষা ক্ষেত্রে কর্পোরেট সংস্কৃতি প্রতিষ্ঠা, প্রসার এবং এই সংস্কৃতির নেতিবাচক দিক আলোচনা করা হয়েছে। টেকসই উন্নয়ন নিশ্চিত করতে সুসম ও গণমুখী শিক্ষা ব্যবস্থা প্রতিষ্ঠার কোন বিকল্প হতে পারেনা। প্রবন্ধের শেষাংশে একটি সুসম ও গণমুখী শিক্ষা ব্যবস্থা প্রতিষ্ঠায় কতিপয় সুপারিশ তুলে ধরা হয়েছে।

১. ভূমিকা :

শিক্ষা ব্যবস্থায় এখন কর্পোরেট সংস্কৃতি চালু হয়ে গেছে। এদেশে অনেক শিক্ষা প্রতিষ্ঠান শিক্ষা সেবা প্রদানের নামে কর্পোরেট পুঁজির প্রত্যক্ষ ছত্র ছায়ায় প্রতিষ্ঠিত হয়েছে, প্রতিষ্ঠিত হতে চলছে। প্রাথমিক থেকে শুরু করে উচ্চ শিক্ষার সকল স্তরে অসংখ্য প্রতিষ্ঠান ইতিমধ্যে গড়ে উঠেছে। অলাভজনক প্রতিষ্ঠানের নামে এসকল প্রতিষ্ঠান কর্পোরেট আদলে পরিচালিত হচ্ছে যা অনাকাঙ্ক্ষিত। এসকল প্রতিষ্ঠান প্রতিষ্ঠা করে কতিপয় ব্যক্তি রাতারাতি শিক্ষানুরাগী, শিক্ষাবিদ সেজে অর্থনৈতিক ও সামাজিক ভাবে লাভবান হচ্ছে। ক্ষতিগ্রস্ত হচ্ছে সমগ্র দেশ ও জাতি, ক্ষতিগ্রস্ত হচ্ছে পুরো শিক্ষা ব্যবস্থা। পরিতাপের বিষয় রাষ্ট্র কাঠামো দেশ ও জাতির দিকে না তাকিয়ে মুষ্টিমেয় ব্যক্তি ও প্রতিষ্ঠানের লাভের পথ সুগম করে দিচ্ছে।

আমাদের শিক্ষা ব্যবস্থায় যা দেখছি তাতে কর্পোরেট সংস্কৃতি প্রতিষ্ঠিত হতে যাচ্ছে এবং ধীরে ধীরে এই সংস্কৃতির একটি পাকাপোক্ত অবস্থান তৈরী হচ্ছে। টেকসই উন্নয়ন নিশ্চিত করতে চাইলে সবার আগে সকল মানুষকে শিক্ষিত করে গড়ে তোলতে হবে। এতে সন্দেহ পোষণ করার কোন অবকাশ নেই। শিক্ষা ব্যবস্থায় কর্পোরেট সংস্কৃতি শিক্ষার প্রকৃত উন্নয়ন, বিস্তার, গণমুখী শিক্ষার প্রসার তথা টেকসই উন্নয়নে প্রতিবন্ধকতা তৈরী করছে।

প্রকৃত শিক্ষার উন্নয়নে শিক্ষার কাঙ্ক্ষিত বিস্তারে গণমুখী শিক্ষার কোন বিকল্প নেই। প্রকৃত অর্থে শিক্ষা হবে সুলভ, সহজলভ্য, গণমুখী। আমাদের দেশের প্রকৃত বাস্তবতায় যে কোন মূল্যে বৃটিশ প্রবর্তিত শিক্ষা ব্যবস্থাকে ভেঙ্গে একটি যুগোপযোগী বাস্তব সম্মত গণমুখী শিক্ষা ব্যবস্থা চালু জরুরী। জাতীয় শিক্ষা নীতি-২০১০ এ উল্লেখ আছে, এই শিক্ষানীতি সংবিধানের নির্দেশনা অনুযায়ী দেশে গণমুখী, সুলভ, সুসম, সর্বজনীন, সুপরিবর্তিত, বিজ্ঞান মনস্ক এবং মানসম্পন্ন শিক্ষাদানে সক্ষম শিক্ষা ব্যবস্থা গড়ে তোলার ভিত্তি ও রণ কৌশল হিসেবে কাজ করবে। শিক্ষা বাণিজ্যিকরণ এরকম বাস্তব সম্মত শিক্ষা ব্যবস্থা চালুর পথে প্রধান প্রতিবন্ধক। শিক্ষা প্রতিষ্ঠানে কর্পোরেট সংস্কৃতি এদেশের শিক্ষার অগ্রযাত্রায় এক ভয়ংকর বাঁধা।

একটি প্রতিষ্ঠান যদি এক হাজার ছাত্র-ছাত্রী ভর্তি করতে পারে আর যদি প্রতি জনের কাছ থেকে ভর্তি ফি বাবদ বছরে ১০০০০ টাকা আদায় করে তাহলে ভর্তি ফি হতে বার্ষিক আয় হয় ১ কোটি টাকা। জনপ্রতি প্রতি মাসের বেতন ৫০০ টাকা ধরা হলে বেতন বাবদ বার্ষিক আয় ৬০ লক্ষ টাকা। এছাড়া বই, খাতা, মনোগ্রাম, জরিমানা, পোশাক, আইডি কার্ড, শিক্ষা সফর, পরিষ্কার ফি ইত্যাদি ছোটখাট অনেক বিষয়ে ফি ধার্য করে সরল হিসেবে বছরে ২ কোটি টাকা আদায় করা যায় সহজেই। এর জন্য উল্লেখযোগ্য বিনিয়োগেরও প্রয়োজন নেই। প্রয়োজন কেবল উদ্যোগ, সামান্য জমি, সাদামাটা একটি বাড়ী, দু'য়েকটি ফ্লাট (ভাড়া করা হলেও চলে)। এখন ব্যয়ের প্রসঙ্গে আসি। যদি প্রতিষ্ঠানের শিক্ষক সংখ্যা ২০ জন হয় এবং প্রদীর্ঘের মাসিক বেতন ৫০০০ থেকে ১০০০০ টাকা ধরা হয় তাহলে বাৎসরিক ব্যয় কত হয়? সরল হিসাবে ১২

লক্ষ থেকে ২৪ লক্ষ টাকা। অন্যান্য ব্যয় সহ মোট ব্যয় ৩০ লক্ষ টাকা ধরে নেই। বাকী আয়ের ভাগীদার উদ্যোক্তা। কত সরল হিসাব। এটি সাধারণ একটি কিন্ডার গার্টেন পর্যায়ে শিক্ষা প্রতিষ্ঠানের কল্পিত হিসাব হলেও দেশের বাস্তব চিত্র তেমনি। কত সহজেই আয় করা যায়। শিক্ষা সেবা প্রদানের নামে কত নিরাপদে বিপুল অর্থ উপার্জন করা যায়। এতে প্রয়োজন হয় কেবল কোন মতে সুনাম অর্জন করা। ঢাকা সহ বড় বড় শহরে এখন এরকম প্রতিষ্ঠান অনায়াসেই স্থাপন করা যাচ্ছে।

এধরনের উদ্যোগ ব্যক্তি, উদ্যোক্তা ও প্রতিষ্ঠানের জন্য লাভজনক। কিন্তু দেশ, জাতি, গণমানুষের অগ্রগতি, উন্নয়ন তথা পুরো শিক্ষা ব্যবস্থার ওপর এক ভয়াংকর চপেটাঘাত।

শিক্ষা সেবা প্রদানের নামে কত সহজে মুনাফা উপার্জন করা যায়। ঢাকা শহরে এ প্রবণতা বেশী। ঢাকার বাইরে বিভাগীয় ও জেলা শহরগুলোতে এমন কি উপজেলা শহর গুলোতেও এখন এরকম শিক্ষা প্রতিষ্ঠান, কোচিং সেন্টার ব্যাণ্ডের ছাতার মত গড়ে উঠছে। প্রশাসনের নাকের ডগায় চলছে এই শিক্ষা বাণিজ্য। যেন দেখার কেউ নেই, বলার কেউ নেই। এসব প্রতিষ্ঠানের আয় ব্যয়ের অসঙ্গতি মনিটরিং হয় বলে মনে হয়না। শিক্ষা ক্ষেত্রে এ সংস্কৃতি এদেশের পুরো শিক্ষা ব্যবস্থাকে নিয়ে যাচ্ছে এক অনিশ্চিক গন্তব্যে।

স্বচ্ছল ব্যক্তির হাত ধরে শিক্ষা প্রতিষ্ঠান গড়ে ওঠার বিষয়টি নতুন নয়। এদেশের শিক্ষা প্রতিষ্ঠান স্থাপনের ইতিহাস ঘাটলে দেখা যাবে, শুরু থেকেই স্বচ্ছল ব্যক্তিদের প্রত্যক্ষ ও পরোক্ষ সহায়তায় শিক্ষা প্রতিষ্ঠান গুলো গড়ে ওঠেছে। এদেশে প্রাতিষ্ঠানিক শিক্ষা তথা শিক্ষা প্রতিষ্ঠান প্রতিষ্ঠার ইতিহাস বেশী দিনের নয়। ঊনবিংশ শতাব্দীর গোড়ার দিকে বৃটিশরা তাদের ছত্র ছায়ায় এদেশে কতিপয় শিক্ষা প্রতিষ্ঠান গড়ে তোলে। পরবর্তীতে জমিদার, প্রশাসনিক কর্তা ব্যক্তি, ধনাঢ্য ব্যক্তিদের উদ্যোগে শিক্ষা প্রতিষ্ঠান গড়ে উঠতে থাকে। বর্তমান সময়ে অবস্থা এমন হয়েছে যে স্বচ্ছল ব্যক্তিদের প্রত্যক্ষ সহায়তা ব্যতিরেকে শিক্ষা প্রতিষ্ঠান গড়ে ওঠার কোন সুযোগ নেই। বর্তমানে শিক্ষানুরাগী ব্যক্তি মানেই স্বচ্ছল ব্যক্তি। আগে স্বচ্ছল ব্যক্তির বাইরেও কিছু শিক্ষিত শিক্ষানুরাগী অস্বচ্ছল ব্যক্তিদের প্রত্যক্ষ সহায়তায় শিক্ষা প্রতিষ্ঠান গড়ে ওঠার নজির আছে। বর্তমানে তা নেই বললেই চলে। আগে স্বচ্ছল ব্যক্তিগণ শিক্ষা প্রতিষ্ঠান স্থাপনে এগিয়ে এলেও তারা তা করেছে এলাকার স্বার্থে, জনগণের স্বার্থে, শিক্ষা বিস্তারের লক্ষ্য নিয়ে। আর এ যুগে স্থাপন করা হচ্ছে বাণিজ্য করার উদ্দেশ্যে, মুনাফার বিষয়টি মাথায় রেখে। গুটি কয়েক ব্যতিক্রম বাদে এ চিত্রই দেশ ব্যাপি দেখা যাচ্ছে। তার মানে দাঁড়ায় আগে শিক্ষানুরাগী ব্যক্তির ছিল স্বচ্ছল এবং একই সাথে সজ্জন। এযুগে শিক্ষানুরাগীরাও স্বচ্ছল তাতে কোন সন্দেহ নেই। কিন্তু তাদের সজ্জন বলা যাবে কি ?

একটি শিক্ষা প্রতিষ্ঠান কর্পোরেট প্রতিষ্ঠানের ন্যায় সুনাম অর্জনে ব্যতিব্যস্ত থাকে। একবার সুনাম অর্জন করতে পারলেই হয়। আর পেছন ফিরে তাকাতে হয়না। সকলেই তাদের ছেলে মেয়েদের এই প্রতিষ্ঠানে ভর্তি করাতে হুমরি খেয়ে পড়ে। প্রতিষ্ঠান এ সুযোগ কড়ায় গন্ডায় কাজে লাগায়। এসকল প্রতিষ্ঠানে ছাত্র শিক্ষক অনুপাতে অসামঞ্জস্য ও অসঙ্গতি থাকে। শিক্ষক কর্মচারীদের বেতন ভাতা প্রদানের হার থাকে তুলনামূলক অনেক কম।

চাকচিক্য বা বিলাসিতার মধ্যে প্রকৃত শিক্ষা নেই। প্রকৃত অর্থে শিক্ষিত হতে হলে শিক্ষার্থীকে হতে হবে অতি সাধারণ, সাদামাটা। বিলাসিতার মাঝে বড় শিক্ষিত হতে পেরেছে এমন নজির সম্ভবত নেই। সুতরাং সকলের জন্য শিক্ষা নিশ্চিত করতে চাইলে শিক্ষার্থীকে সাদামাটা সাধারণ হতে উদ্ভুদ্ধ করতে হবে। আমাদের দুর্ভাগ্য যে, এ সংস্কৃতি ক্ষয়ে যাচ্ছে। শিক্ষিত মানুষগুলো ক্রমান্বয়ে লেবাসধারী হয়ে উঠছে। শিক্ষা প্রতিষ্ঠানগুলোকে পরিচ্ছন্ন ও সুন্দর করে গড়ে তোলার চেয়ে বাণিজ্যিক প্রতিষ্ঠানের ন্যায় চাকচিক্যময় করে গড়া তোলা হচ্ছে।

একটি শিক্ষা প্রতিষ্ঠানের প্রতি বছরের ফলাফল কেমন হওয়া উচিত। এর সরল উত্তর কিছু শিক্ষার্থী খুব ভালো ফলাফল করবে। মধ্যম সারির বেশী সংখ্যক শিক্ষার্থী মাঝামাঝি পর্যায়ে ফলাফল করবে। কিছু ফেল করবে। প্রতিটি শিক্ষা প্রতিষ্ঠানের প্রতি বছরের ফলাফল এমনি হওয়া স্বাভাবিক এবং প্রত্যাশিত। একটি শিক্ষা প্রতিষ্ঠান বছরের পর বছর ধারাবাহিক ভাবে শতভাগ পাশ করতে পারেনা। শতভাগ ফেলও করতে পারেনা। যদি বছরের পর বছর একটি প্রতিষ্ঠান ভালো ফলাফল করে তাহলে ঐ প্রতিষ্ঠানের প্রতি সবাই আকৃষ্ট হবে। সবাই চাইবে তার ছেলে মেয়েকে ঐ প্রতিষ্ঠানে ভর্তি করাতে। ভর্তির জন্য শুরু হবে অসুস্থ তীব্র প্রতিযোগিতা। যে প্রতিযোগিতায় স্বল্প আয়ের মানুষেরা পরাস্ত হয়, হয়ে চলছে। এটি মোটেও কাম্য নয়। অনাকাঙ্ক্ষিত হলেও এই অনৈতিক কাজ করে অসংখ্য প্রতিষ্ঠান শিক্ষা সেবাকে কেবল মাত্র স্বচ্ছল ঘরের ছেলে মেয়েদের জন্য নিশ্চিত করে মুনাফা অর্জন করে চলছে।

বাংলাদেশের মত দেশের উন্নয়ন নিশ্চিত করতে চাইলে শিক্ষা প্রসারের বিষয়টি বিবেচনায় নিতে হবে সবার আগে। একই সাথে শিক্ষার গুণগত মান নিশ্চিত করতে হবে। প্রকৃত উন্নয়ন চাইলে এর কোন বিকল্প নেই। যে কোন মূল্যে দ্রুততম সময়ে সকল মানুষকে শিক্ষিত করতে হবে। শিক্ষা প্রসারের লক্ষ্যে নারী শিক্ষার প্রচলন বিশেষ করে মুসলিম নারীদের শিক্ষার অধিকার প্রতিষ্ঠিত করার জন্য নারী শিক্ষার তিন অগ্রদূত ফয়েজুল্লাহ চৌধুরী, খায়েরুল্লাহ খাতুন, এবং বেগম রোকেয়া আজীবন নিরলস কাজ করে গেছেন। ১৮৭৩ সালে কুমিল্লা শহরে ফয়েজুল্লাহ চৌধুরী, ১৮৯৫ সালে সিরাজগঞ্জ মহকুমার হোসেনপুর গ্রামে মুনিশ মেহেরুল্লাহ এবং খায়েরুল্লাহ খাতুন এবং ১৯১১ সালে কলকাতায় বেগম রোকেয়া মেয়েদের জন্য বালিকা বিদ্যালয় স্থাপন করেন। আগে শিক্ষানুরাগী ব্যক্তির শত প্রতিকূলতার মাঝেও শিক্ষা বিস্তারে নিরলস কাজ করে গেছেন। এ যুগে কর্পোরেট সংস্কৃতি শিক্ষা অনুরাগীর নামে মূলত: উদ্যোগী শ্রেণি গড়ে তোলছে। কাজী মোতাহার হোসেন বলেছেন, 'কোন জাতি কতটা সভ্য, তা নির্ণয় করার সবচেয়ে উৎকৃষ্ট মাপকাঠি হচ্ছে তার শিক্ষা ব্যবস্থা, পাঠ্যপুস্তক ও সাধারণ সাহিত্য'। জ্যা জ্যাকস রুশোর শিক্ষানীতির লক্ষ্য ছিল পরিপূর্ণ মানুষ গড়ে তোলা। শিক্ষা ক্ষেত্রে কর্পোরেট সংস্কৃতি পরিপূর্ণ মানুষ গড়ার প্রতিবন্ধক। এদেশে শিক্ষা প্রসারে এবং শিক্ষার প্রকৃত মান উন্নয়নে প্রধান বাঁধা হচ্ছে শিক্ষা ব্যবস্থায় কর্পোরেট সংস্কৃতি। আলোচ্য প্রবন্ধে শিক্ষা বাণিজ্যিকরণ কিভাবে আমাদের শিক্ষা ব্যবস্থাকে ক্ষতিগ্রস্ত করছে? টেকসই উন্নয়নে কিভাবে প্রতিবন্ধকতা তেরী করছে? - এ বিষয়ে আলোকপাত করার চেষ্টা করা হবে।

২. লক্ষ্য ও উদ্দেশ্য :

আলোচ্য প্রবন্ধের মূল লক্ষ্য হলো শিক্ষা ব্যবস্থায় কর্পোরেট সংস্কৃতি প্রতিষ্ঠার মধ্য দিয়ে কিভাবে আমাদের শিক্ষা ব্যবস্থাকে ক্ষতিগ্রস্ত করছে এ বিষয়ে আলোকপাত করা। টেকসই উন্নয়ন নিশ্চিত করতে যে কোন মূল্যে এই সংস্কৃতিকে প্রতিহত করার প্রয়োজনীয়তার কথা তোলে ধরা। আর এলক্ষ্যকে সামনে রেখে উদ্দেশ্য গুলো নিম্নে উপস্থাপন করা হলো :

১. শিক্ষা ব্যবস্থায় কর্পোরেট সংস্কৃতি কী, এর স্বরূপ ও কারণ আলোচনা করা।
২. শিক্ষা ব্যবস্থায় কর্পোরেট সংস্কৃতির নেতিবাচক দিকগুলো আলোকপাত করা।
৩. শিক্ষা ব্যবস্থায় কর্পোরেট সংস্কৃতির প্রতিষ্ঠার পেছনে গণমাধ্যমের ভূমিকা তোলে ধরা।
৪. কর্পোরেট সংস্কৃতির কবল থেকে শিক্ষা ব্যবস্থাকে মুক্ত করতে কতিপয় সুপারিশ উপস্থাপন করা।

৩. তথ্য ও পদ্ধতি :

আলোচ্য প্রবন্ধে ব্যবহৃত তথ্য সমূহ মাধ্যমিক উৎস হতে নেয়া হয়েছে। বাংলাদেশ অর্থনৈতিক সমীক্ষা, বাংলাদেশ অর্থনীতির সমিতি সহ বিভিন্ন সংস্থা কর্তৃক প্রকাশিত বিভিন্ন জার্নাল, বিভিন্ন গ্রন্থ, ইন্টারনেট, বিভিন্ন দৈনিকে প্রকাশিত বিভিন্ন প্রতিবেদন ও প্রবন্ধের সহায়তা নেয়া হয়েছে। এ ছাড়া দেশের সামগ্রিক পরিস্থিতির উপর লেখকের অভিজ্ঞতার আলোকে লব্ধ কতিপয় পর্যবেক্ষণের ওপর আলোকপাত করা হয়েছে।

৪. শিক্ষা ব্যবস্থায় কর্পোরেট সংস্কৃতি কী এবং এর স্বরূপ ? :

শিক্ষা ব্যবস্থায় কর্পোরেট সংস্কৃতি কী ? এ বিষয়ে স্পষ্ট ও সুনির্দিষ্ট ধারণা দেওয়া কঠিন। সরল কথায় বলা যায়, শিক্ষা বাণিজ্যিকরণ বা শিক্ষার মত একটি অতীব জরুরী সেবাকে পণ্যে পরিণত করার প্রক্রিয়াই কর্পোরেট সংস্কৃতি। এ সংস্কৃতির আড়ালে লুকিয়ে আছে অর্থ লিপ্সা। মুনাফা লোভীদের গুণগত শিক্ষা প্রদানের নামে মুনাফা অর্জনই এ সংস্কৃতির মূল লক্ষ্য। ফলে সকল স্তরের সকল মানুষের শিক্ষার অধিকার নিশ্চিত করার কথা উপেক্ষা করে কেবল স্বচ্ছল ঘরের ছেলে মেয়েদের পড়াশুনা নিশ্চিত করা কর্পোরেট সংস্কৃতির একটি নিন্দনীয় দিক। মুনাফার চিন্তা আছে বলে এখানে সনদ বাণিজ্য, জালিয়াতি, অধিক ফি আদায়, তথ্য গোপনের মতো গুরুতর অভিযোগ আছে। শিক্ষা প্রদানের আড়ালে এসকল অনৈতিক কাজ হবেই বা না কেন ? কর্পোরেট সংস্কৃতির মূল লক্ষ্য শিক্ষা প্রদান হতে পারেনা। মূল বিবেচ্য বিষয় হলো মুনাফা অর্জন। শিক্ষা প্রদান উপলক্ষ্য মাত্র। বিনয় মিত্র তার ‘বাংলাদেশের শিক্ষা ব্যবস্থা রূপ ও রীতি’ নামক গ্রন্থে “ আমাদের ছাত্রছাত্রীরা, এখন আর বিদ্যাগ্রহীতা নয়, বিদ্যাক্রেতা ” বলে উল্লেখ করেছেন। তিনি আরো বলেছেন, “ বিদ্যা, যা আগে ছিল পূজার পর্যায়ে, একদিন তা হলো আত্মোজ্জ্বল হওয়ার অলংকার। পরে হলো চাকরিপ্রাপ্তির অস্ত্র, এখন হয়েছে বাজারি পণ্য। শিক্ষালয় নামক সুদৃশ্য ভবনগুলো পবিত্রতা হারিয়ে, যেন একেকটা বিপনি-বিতান হয়ে উঠেছে। শিক্ষা এখন চড়ামূল্যের পণ্য, যার খুচরা ক্রেতার নাম ছাত্র, খুচরা বিক্রেতার নাম শিক্ষক, এর পাইকার ব্যবসায়ী হলো প্রতিষ্ঠানের প্রতিষ্ঠাতা, অথবা ক্ষমতাসীন কোন রাজনীতিক। যারা বিদ্যালয়ের দেহ গড়েন, বোর্ড-বিশ্ববিদ্যালয়-মন্ত্রণালয় বা সংশ্লিষ্ট স্থান থেকে যথাযথ স্বীকৃতি বা অনুমতিপত্র নিয়ে আসেন, তারা বহু টাকা বিনিয়োগ করেন অবশ্যই। বিনিয়োগকৃত টাকা থেকে মুনাফা না এলে ব্যবসায়ী তার টাকা খাটাবেন কেন ? লাভ বিনা টাকা দান, জনকল্যাণমূলক নিঃস্বার্থ বিনিয়োগ-বর্তমান বঙ্গীয় সমাজে এমন উদার, নির্মোহ ব্যক্তির দেখা মেলা ভার। সত্যি তাই। শিক্ষার লক্ষ্য চাকরি নয়, জ্ঞানার্জন। জ্ঞানের আলোই নিজেকে আলোকিত করে সে আলোয় অন্যকে আলোকিত করবে। প্রকৃত উদ্দেশ্য হলো সুশিক্ষিত হওয়া, সুন্দর মনের মানুষ হওয়া - দিন যতই অতিবাহিত হচ্ছে, এই মূল্যবোধের অবনতি হচ্ছে, অবক্ষয় হচ্ছে। শিক্ষার উদ্দেশ্য এখন শিক্ষিত হয়ে যেন তেন ভাবে অর্থ উপার্জন করা। যে শিক্ষা গ্রহণ করে মানুষ সৎ, উদার, কর্মঠ, মুক্তবুদ্ধির মানুষ হিসেবে সমাজে প্রতিষ্ঠিত করবে সে শিক্ষাই এখন মানুষের এসব মূল্যবোধে কুঠারাঘাত করে চলছে। সংকোচিত হতে চলছে সুকুমারভিত্তি, মননশীলতা, মানবিকতার চর্চা। শিক্ষা এখন মুনাফা অর্জনের নির্ভরযোগ্য মাধ্যম হিসেবে প্রতিষ্ঠা পেতে যাচ্ছে। দেশের প্রথম বেসরকারি বিশ্ববিদ্যায় নর্থ সাউথ বিশ্ববিদ্যালয়ের ১৩তম সমাবর্তনে মহামান্য রাষ্ট্রপতি বেসরকারি বিশ্ববিদ্যালয় গুলোকে টিউশন ফি কমানো এবং দেশের সাধারণ মানুষের স্বার্থে কাজ করার প্রচুর সুযোগ আছে বলে বিশ্ববিদ্যালয়গুলোকে আহবান জানান। সমাবর্তনে তিনি আরো বলেন, “ Keep in mind that education shouldn't be only based on curricula and certificates, and universities should not be merely profit-making organizations”(The Daily Star, 10 January, 2010)।

অনেক শিক্ষক প্রাইভেট টিউশনি করে প্রচুর অর্থ উপার্জন করে চলছে যা নৈতিকভাবে সমর্থনযোগ্য নয়। এছাড়া বিভিন্ন প্রতিষ্ঠান কোচিং সেন্টার স্থাপন করে অনেক উদ্যোক্তা কোটি কোটি টাকার মালিক বনে গেছেন। প্রচুর বিত্ত বৈভবের

অধিকারী হয়ে গেছেন রাতারাতি এমন নজির পাওয়া যাবে অনেক । কোচিং ও প্রাইভেট বাণিজ্যের হিসাব জানতে দেশে প্রথম বারের মত একটি জরিপ পরিচালনা করে সরকারি সংস্থা বাংলাদেশ পরিসংখ্যান ব্যুরো (বিবিএস) । জরিপে দেখা গেছে, একজন শিক্ষার্থী বছরে তার শিক্ষার পেছনে যে টাকা ব্যয় করে, তার মধ্যে ৩০ শতাংশ চলে যায় কোচিং আর হাউস টিউটরের ফি বাবদ । অর্থাৎ একজন শিক্ষার্থী বছরে তার পেছনে যে টাকা ব্যয় করে, তার মধ্যে ৩০ টাকা খরচ হয় কোচিং ও প্রাইভেট টিউশনিতে (কালের কণ্ঠ ২৯ এপ্রিল, ২০১৬) ।

একজন ব্যক্তি যার জীবন মুনাফার জন্য নিবেদিত । মুনাফার পেছনে ছুটে প্রচুর অর্থ কড়ি, বিত্ত বৈভবের মালিক বনে গেছেন । এরকম একজন দেশ ও জনগণের কথা চিন্তা করতে পারে না । চিন্তা করার কথাও না । মুনাফালোভী অর্থলিপ্সু একজন মানুষ সব সময় নিজের এবং নিজের পরিবার পরিজনের ভোগ বিলাসিতা নিয়েই ব্যতিব্যস্ত থাকে । হতাশাজনক সত্য এরকম মুনাফালোভী ব্যক্তিবর্গ আজ রাতারাতি শিক্ষানুরাগী বনে যাচ্ছে । এদেশের আইন, রাজনীতি, প্রশাসন তাদের অনুপ্রাণিত করেছে । কর্পোরেট আদলে গড়ে ওঠা শিক্ষা প্রতিষ্ঠান গুলো একই নামে বিভিন্ন শহরে অথবা একাধিক প্রতিষ্ঠান স্থাপন করে চলছে । লক্ষ্যণীয় বিষয় এসব প্রতিষ্ঠানে সাধারণ শ্রমজীবী স্বল্প আয়ের মানুষের ছেলে মেয়েদের পড়াশুনা করার ন্যূনতম কোন সুযোগ নেই । আর্থিক স্বচ্ছলতা এসকল প্রতিষ্ঠানে পড়াশুনা করার মূল মানদণ্ড । শিক্ষা বাণিজ্যিকরণ আজ আমাদের কোথায় নিয়ে যাচ্ছে ? যাদের অগ্রাধিকার ভিত্তিতে পড়াশুনার অধিকার নিশ্চিত করা জরুরী । উল্টো তাদের বধিত করা হচ্ছে । শিক্ষা বাণিজ্যিকরণের এই সংস্কৃতি এমন এক পর্যায়ে যাচ্ছে যে, শিক্ষা আজ স্বল্প আয়ের মানুষের জন্য দুর্লভ পণ্যে পরিণত হচ্ছে । আর তা কর্পোরেট পুঁজির কাছে দিনে দিনে জিম্মি হতে চলছে, যেন কৃত্রিম সংকট তৈরী করে দাম বাড়িয়ে তোলা হচ্ছে । শিক্ষা লাভের অধিকারটুকু ক্রমাশয়ে সাধারণ মানুষের নাগালের বাইরে চলে যাচ্ছে । মোতাহার হোসেন চৌধুরী তাঁর ‘শিক্ষা ও মনুষ্যত্ব’ প্রবন্ধে বলেছেন, “ মানুষের জীবনকে একটি দোতলা ঘরের সঙ্গে তুলনা করা যেতে পারে । জীবসত্তা সেই ঘরের নিচের তলা আর মানবসত্তা বা মনুষ্যত্ব ওপরের তলা । জীবসত্তার ঘর থেকে মানব সত্তার ঘরে উঠবার মই হচ্ছে শিক্ষা । শিক্ষাই আমাদের মানব সত্তার ঘরে নিয়ে যেতে পারে । ” শিক্ষা মানুষকে মানবিক করে তোলাবে । একটি দেশের শিক্ষা ব্যবস্থা এমনই হওয়া উচিত । এদেশের সামগ্রিক উন্নয়নে একটি শিক্ষা প্রতিষ্ঠানের গুরুত্ব অনেক । প্রতিষ্ঠান হিসেবে দায়বদ্ধতার দিক বিবেচনায় স্বল্প আয়ের মানুষ বিশেষ করে দরিদ্র শ্রমজীবী মানুষের ছেলে মেয়েদের জন্য শিক্ষার অধিকার নিশ্চিত করা যে কোন শিক্ষা প্রতিষ্ঠানের প্রথম ও প্রধান কাজ হওয়া উচিত । শিক্ষা ক্ষেত্রে কর্পোরেট সংস্কৃতি এ বিষয়টিকে শতভাগ অস্বীকার করে । এতে করে প্রকৃত শিক্ষা ব্যাহত ও ক্ষতিগ্রস্ত হচ্ছে, শিক্ষার গুণগত মান ক্ষুণ্ণ হচ্ছে, থমকে আছে শিক্ষা প্রসারের বিষয়টি । কেবল মাত্র স্বচ্ছল পরিবারের ছেলে মেয়েদের পড়াশুনা নিশ্চিত করা দেশ ও জাতির কোন কল্যাণ বয়ে আনতে পারেনা । দেশের প্রকৃত উন্নয়নে যে গণমুখী শিক্ষা প্রতিষ্ঠান প্রতিষ্ঠার প্রয়োজন তার পথ সত্যিকার অর্থে রুদ্ধ হয়ে যাচ্ছে । একটি শিক্ষা প্রতিষ্ঠানের কাজ হলো শিক্ষা দানের পাশাপাশি শিক্ষক কর্মচারীদের মর্যাদা প্রতিষ্ঠা করা, তাদের সম্মান ও মর্যাদা সমুন্নত রাখা । এজন্য প্রয়োজন আর্থিক ও অআর্থিক সকল সুবিধা নিশ্চিত কল্পে বাস্তব সম্মত পদক্ষেপ গ্রহণ করা । শিক্ষা বাণিজ্যিকরণ এদিকে কোন চিন্তা করেনা, করার প্রয়োজনও মনে করেনা । শিক্ষা ক্ষেত্রে কর্পোরেট সংস্কৃতি শিক্ষক কর্মচারীদের মুনাফা লাভের হাতিয়ার হিসেবে গণ্য করে । এখানে একজন শিক্ষক শিক্ষক হিসেবে নয়, শ্রমিক হিসেবে পরিগণিত হচ্ছে । এছাড়া চাকুরীর স্থায়িত্ব, আবাসন সুবিধা, একেবারেই নগণ্য । বাণিজ্য করার নিমিত্তে গড়ে ওঠা শিক্ষা প্রতিষ্ঠান গুলোর প্রকৃত চিত্র এমনই । এসকল প্রতিষ্ঠানের শিক্ষক কর্মচারীদের বেতন ভাতা সময় বিবেচনায় নিতান্তই কম । প্রশ্ন হলো এসকল প্রতিষ্ঠানে স্বল্প বেতনে শিক্ষকতা করছে কেন ? দেখা যাবে স্বচ্ছল পরিবারের ছেলে মেয়েরা পড়াশুনা করে বলে টিউশনি, কোচিং বাণিজ্য করে অনেক অর্থ উপার্জন করা যায় । হচ্ছেও তাই । এক্ষেত্রে নীতি নৈতিকতা, দায়বদ্ধতা, দায়িত্ববোধ বিবেচনা করা হচ্ছেনা । প্রাইভেট টিউশনি করে সহজেই প্রচুর অর্থ উপার্জন করা যায় বলে বেতন ভাতার গুরুত্ব কমে যায় । কিছু বেকার যুবক বাধ্য হয়ে এসকল প্রতিষ্ঠানে কেবল রুটি রুজির জন্য শিক্ষকতা করতে বাধ্য হচ্ছে । বাস্তব চিত্র এমন যে, একটি কলেজ পর্যায়ের

স্বনাম ধন্য একটি শিক্ষা প্রতিষ্ঠানে কর্মরত একজন শিক্ষক সরকারি প্রাথমিক বিদ্যালয়ে চাকুরি পেয়েছে। এক্ষেত্রে তিনি কোনটি বেছে নেবেন? এক্ষেত্রে কলেজের চেয়ে সরকারি প্রাথমিক বিদ্যালয়ের শিক্ষকতা তার কাছে বেশী লোভনীয় নয় কি?

শিক্ষা ক্ষেত্রে কর্পোরেট সংস্কৃতি প্রতিষ্ঠা ও বিস্তৃতির নেপথ্য কারণ সরকারি শিক্ষা প্রতিষ্ঠানগুলোতে শিক্ষক সংকট, শিক্ষকদের বাণিজ্যিক মনোভাব, শিক্ষক নিয়োগে দুর্নীতি, শিক্ষকতা পেশায় মেধাবীদের না আসা, অবকাঠামোগত সমস্যা ইত্যাদি। সরকারি শিক্ষা প্রতিষ্ঠানগুলোর প্রতি মানুষের একটি বন্ধমূল ধারণা জন্মেছে এই বলে যে, সরকারি শিক্ষা প্রতিষ্ঠানগুলোতে তেমন পড়াশুনা হয়না। সরকারের পক্ষ থেকে শিক্ষার মানোন্নয়নে নিবেদিত বলা হলেও বাস্তব চিত্র ভিন্ন। এখনো গ্রামের অসংখ্য প্রতিষ্ঠান রয়েছে ভাঙ্গাচোড়া, শিক্ষক সংকট, অনুন্নত রাস্তাঘাট সহ অনেক সমস্যা। গত ২৭ মে, ২০১৫ ইং তারিখে কালের কণ্ঠ পত্রিকার একটি প্রতিবেদনে উল্লেখ করা হয় ২০১২ সাল পর্যন্ত দেশে সরকারি প্রাথমিক বিদ্যালয়ের সংখ্যা ছিল প্রায় ৩৬ হাজার। ২০১৩ থেকে এর সঙ্গে যোগ হয়েছে আরো ২৬ হাজার। সাত বছর ধরে সরকারি প্রাথমিক বিদ্যালয়ে প্রধান শিক্ষক নিয়োগ বন্ধ। ফলে পুরণো সেই ৩৬ হাজার বিদ্যালয়ের ১৫ হাজারেই নেই প্রধান শিক্ষক। বেশির ভাগ স্কুলেই শিক্ষক সংখ্যা চারজন। প্রধান শিক্ষক না থাকলে বাকি তিন জনের মধ্য থেকে একজনকে ভারপ্রাপ্ত প্রধান শিক্ষকের দায়িত্ব পালন করতে হয়। ব্যস্ত থাকতে হয় প্রশাসনিক, এবং সরকারি ও স্থানীয় নানা কাজে। ফলে দুজনকেই মূলত চালাতে হয় ক্লাস। একটি স্কুলে প্রাক-প্রাথমিকের ক্লাসের সময় আড়াই ঘণ্টা। আর প্রথম ও দ্বিতীয় শ্রেণিতে চারটি ক্লাস এবং তৃতীয় থেকে পঞ্চম শ্রেণি পর্যন্ত ৪৫ মিনিটের ছয়টি ক্লাস হওয়ার কথা। কিন্তু দুজন শিক্ষকের পক্ষে এত ক্লাস নেওয়া আদৌ সম্ভব নয়। কোন রকমে এসব স্কুলে সিলেবাস শেষ করানো হলেও শিশুরা আসলে কতটুকু শিখছে, সে প্রশ্ন শিক্ষাবিদদের। ২০১৫ সালের ০৩ ফেব্রুয়ারি কালের কণ্ঠ পত্রিকার ‘পাহাড়চূড়ায় শিক্ষা লড়াই’ শিরোনামে আরেকটি প্রতিবেদনে উল্লেখ করা হয়, ১৯৭৮ সালে জাতীয়করণ করা হলেও রোয়াংছড়ির সাইঙ্গ্যাপাড়া সরকারি প্রাথমিক বিদ্যালয়ে শ্রেণি কক্ষের সংকটে শিশু শ্রেণির ছুটির পর ষষ্ঠ শ্রেণির শিক্ষার্থীদের বসানো গেলেও সপ্তম ও অষ্টম শ্রেণির শিক্ষার্থীদের বসতে হয় খোলা আকাশের নীচে। গাছের সঙ্গে হেলান দিয়ে রাখা ব্ল্যাকবোর্ডে চক দিয়ে লিখে ক্লাস নেন শিক্ষক। আর শিক্ষার্থীরা শিক্ষা নেন একনিষ্ঠ মনে। এ চিত্র দুই-এক দিনের নয়, সারা বছরের।

প্রয়োজনের তুলনায় কম হলেও শিক্ষা খাতে ব্যয় কিন্তু কম নয়। ২০১৫-২০১৬ অর্থ বছরের বাজেটে শিক্ষা খাতে বরাদ্দ ছিল ১৭১০৩ কোটি টাকা। ২০১৬-২০১৭ অর্থ বছরে বরাদ্দের পরিমাণ দাঁড়ায় ২৬৮৪৭ কোটি টাকা এবং এক বছরে এ খাতে ব্যয় বৃদ্ধির হার প্রায় ৫৭ শতাংশ (Dhaka Tribune, 03 June, 2016)। প্রতি বছর বাজেটে ক্রমবর্ধমান হারে শিক্ষা খাতের ব্যয়ের পরিমাণ বাড়ছে। এর পরেও সারা দেশে রোয়াংছড়ির সাইঙ্গ্যাপাড়া সরকারি প্রাথমিক বিদ্যালয়ের মত অসংখ্য শিক্ষা প্রতিষ্ঠানে শ্রেণি কক্ষের সংকট রয়ে গেছে। তার মানে দাঁড়ায় শিক্ষা খাত উন্নয়নে নিরন্তর প্রচেষ্টা চলছে বলা হলেও এখাত উন্নয়নে আমরা সুচিন্তিত ও পরিকল্পিত ব্যয় নিশ্চিত করতে পারছি না। শিক্ষায় কর্পোরেট সংস্কৃতি বিস্তারে এটি একটি অন্যতম কারণ।

এসকল বিভিন্ন কারণে সবাই মনে করে সরকারি শিক্ষা প্রতিষ্ঠানগুলোতে এখন আর আগের মত পড়াশুনা হয়না। ব্যক্তি উদ্যোগে প্রতিষ্ঠিত শিক্ষা প্রতিষ্ঠানগুলোর চাকচিক্য দেখে সবাই আকৃষ্ট হয় এবং মনে করে এসকল প্রতিষ্ঠানে পড়াশুনার মান অনেক ভালো। বিশেষ করে শিক্ষিত, সচেতন, স্বচ্ছল মানুষেরাই তাদের ছেলে মেয়েদের সরকারি শিক্ষা প্রতিষ্ঠানগুলোতে পড়াতে আর আগ্রহী নয়। বিশেষ করে প্রাথমিক ও মাধ্যমিক পর্যায়ে ছেলে মেয়েদের পড়াতে তাঁরা ব্যক্তি উদ্যোগে প্রতিষ্ঠিত প্রতিষ্ঠানগুলোকেই বেছে নেয়।

২০০০ সাল থেকে এ পর্যন্ত যারা সচিব পদমর্যাদায় অধিষ্ঠিত হয়েছেন বা অধিষ্ঠিত হয়ে অবসরে গেছেন ১৯৫০ ও ১৯৬০ এর দশকে তাদের কৈশোর জীবন কেটেছে। এটি সত্য যে তাঁদের অধিকাংশই প্রাথমিক ও মাধ্যমিক পর্যায়ে গ্রামে বা মফস্বল শহরে পড়াশুনা করেছেন। আর তখনকার সময়ে পড়াশুনা করার প্রধান অনুসঙ্গ ছিল হারিক্যান। বিদ্যুতের ব্যবহার তেমন ছিলনা বলে গ্রাম ও মফস্বল শহরের শিক্ষার্থীদের হারিক্যানের আলোই পড়াশুনা করতে হয়েছে। আর হারিকানের

আলোয় পড়াশুনা করে বিবেচ্য সময়ে অনেকেই বিভিন্ন ক্ষেত্রে প্রতিষ্ঠিত হয়েছেন। আমাদের মানসিকতা এমন পর্যায়ে যে, হারিক্যানের আলোই পড়াশুনা করে যারা প্রতিষ্ঠিত হয়েছেন আজ তাঁরাই তাঁদের ছেলে মেয়েদের শীতাতপ নিয়ন্ত্রিত কক্ষে পড়াশুনা প্রদান করা হয় এমন শিক্ষা প্রতিষ্ঠানে পড়াতে চায়। যে ব্যক্তি হারিকেনের আলোয় পড়াশুনা করে সমাজে সুপ্রতিষ্ঠিত হয়েছেন তিনিই তাঁর ছেলে মেয়েদের পড়াশুনায় বিলাস বহুল শীতাতপ নিয়ন্ত্রিত কক্ষের প্রয়োজন অনুভব করেন। প্রকৃত অর্থে আমাদের দেশের উচ্চ শিক্ষিত, প্রতিষ্ঠিত, স্বচ্ছল ঘরের মানুষগুলো সচেতন নয়। একজন সত্যিকার সচেতন মানুষ তাঁর ছেলে মেয়েদের সাধারণ হতে উদ্ভুদ্ধ করবে। সাধারণ মানুষের সাথে মেলামেশা করার জন্য প্ররোচিত করবে। আমাদের দৃষ্টিভঙ্গি, মন মানসিকতা ক্রমশ: বাণিজ্যিক হয়ে উঠছে। শিক্ষা ক্ষেত্রে কর্পোরেট সংস্কৃতি গড়ে উঠার পেছনে আমাদের এই দৃষ্টিভঙ্গিই অনেকাংশে দায়ী। এ সংস্কৃতি শিক্ষা ক্ষেত্রে এক ভয়ানক ব্যাধি হলেও সরকার, শিক্ষাবিদ, গণমাধ্যম, গবেষক, তথা সচেতন মহল এ বিষয়ে চরম উদাসীন। ফলে শিক্ষা ক্ষেত্রে কর্পোরেট সংস্কৃতি এক প্রতিষ্ঠিত রূপ পেতে যাচ্ছে।

৫. কর্পোরেট সংস্কৃতির নেতিবাচক দিক :

শিক্ষা বাণিজ্যিকরণ শিক্ষা ক্ষেত্রে অস্থিরতা সৃষ্টি করে। বাংলাদেশের বেসরকারি বিশ্ববিদ্যালয় গুলোর দিকে তাকালে এই সত্যতা মেলে। মালিকে মালিকে দ্বন্দ এবং এই দ্বন্দের বহিঃপ্রকাশ হিসেবে আলাদা আলাদা ক্যাম্পাস স্থাপন, দীর্ঘদিনেও স্থায়ী ক্যাম্পাস গড়ে না তোলা, বিনা নোটিশে কার্যক্রম বন্ধ করে দেওয়া, অর্থের জন্য শিক্ষার্থীদের হয়রানী, অযৌক্তিক ফি আদায় এমন কি কাউকে না জানিয়ে মালিকদের পলায়নের মত ঘটনা গণমাধ্যমের বদৌলতে দেখতে পাই। উচ্চ শিক্ষা প্রদানের নামে এসব প্রতিষ্ঠান গড়ে উঠলেও মুনাফা লাভের নেশায় অনাকাঙ্ক্ষিত এতসব ঘটনা ঘটছে। গত ৩ অক্টোবর, ২০১৬ ইং তারিখে সমকাল পত্রিকার এক প্রতিবেদনের শিরোনামে ছিল ‘ মালিকরা গা ঢাকা দিয়েছে বিপদে ১২ হাজার শিক্ষার্থী ’। এতে উল্লেখ করা হয়, দারুল ইহসান বিশ্ববিদ্যালয়ের চার মালিকপক্ষের শীর্ষ ব্যক্তিদের সবাই গা-ঢাকা দিয়েছেন। কেউ কেউ বিদেশে পাড়ি জমিয়েছেন। বিশ্ববিদ্যালয় মঞ্জুরি কমিশনের কর্মকর্তরাও তাদের খুঁজে পাচ্ছেন না। এতে ১২ হাজার শিক্ষার্থী অনিশ্চয়তায় রয়েছেন। উদ্ভদ বিষয় নয় কি? মানুষের মেধা ও মননের সর্বোচ্চ ব্যবহারের মাধ্যমে মানুষ নিজেকে কত ছোট করতে পারে। ভাবা যায়? আমাদেরকে তাই ভাবতে হচ্ছে। দেখতে হচ্ছে শিক্ষিত মানুষেরা কিভাবে নিজেদের আত্মমর্যাদা বিলিয়ে দেয়। গত ০৪ এপ্রিল, ২০১৬ ইং তারিখে কালের কণ্ঠ পত্রিকায় শরিফুল আলম সুমনের ‘ অতীশ দীপঙ্কর বিজ্ঞান ও প্রযুক্তি বিশ্ব বিদ্যালয় টিউশন ফি ট্রাস্টিদের ভাগবাটোয়ারা ’ শিরোনামে একটি প্রতিবেদনে উল্লেখ করা হয়, আইন অনুযায়ী বেসরকারি বিশ্ববিদ্যালয় হবে সম্পূর্ণ অলাভজনক। বিশ্ববিদ্যালয়ের খরচ বাদে আয়ের পুরো অর্থ ব্যবহার হবে উন্নয়নকাজে। অথচ উল্টো নিয়মে চলছে অতীশ দীপঙ্কর বিজ্ঞান ও প্রযুক্তি বিশ্ববিদ্যালয়। মাস শেষে টিউশন ফি নিজেদের মধ্যে ভাগবাটোয়ারা করে নেন ট্রাস্টি বোর্ডের সদস্যরা। এমনকি কে কত টাকা নেবেন তা বোর্ড সভার কার্য বিবরণীতে আগে থেকেই নির্ধারণ করে দেওয়া আছে। আর যারা সরাসরি টাকা নিতে পারেন না তাঁদের বিশ্ববিদ্যালয়ে সন্মানজনক পদে বসিয়ে দেওয়া হচ্ছে টিউশন ফির ভাগ। এমনকি ট্রাস্টি বোর্ডের কয়েক সদস্যের বিরুদ্ধে সনদ বাণিজ্যের অভিযোগও রয়েছে।

দেশের প্রকৃত টেকসই উন্নয়নে শিক্ষাকে অগ্রাধিকার বিবেচনা করে প্রতি বছরে বাজেটে বরাদ্দ দেওয়া হয়। ২০১৬-২০১৭ অর্থ বছরের বাজেটে মাননীয় অর্থ মন্ত্রী বলেছেন, শিক্ষা ও মানব সম্পদ উন্নয়নকে আমরা সর্বোচ্চ গুরুত্ব দিয়ে আসছি। তাই সামগ্রিক শিক্ষা খাতের ব্যয়কে দীর্ঘমেয়াদি বিনিয়োগ হিসেবে বিবেচনা করে এ খাতের উন্নয়নে আমরা বিভিন্ন কার্যক্রম গ্রহণ করছি। বাস্তবে কি তাই দেখতে পারছি?

দেশ ও সমাজের সেবায় মানুষকে উপযোগী করে গড়ে তোলার প্রধান মাধ্যম শিক্ষা। শিক্ষার মাধ্যমে মানুষের মানবিক গুণ গুলো বিকশিত হবে। একজন মানুষ দেশ প্রেমিক, মানব হিতৈষী তথা নিজের কর্ম দক্ষতাকে মানব কল্যাণে ব্যয় করবে। একজন শিক্ষার্থী গণিত, দর্শন, ভাষা, সাহিত্য, ললিতকলা, বিজ্ঞান বিষয়গুলো রপ্ত করার পাশাপাশি দেশের ইতিহাস, ঐতিহ্য, সভ্যতা, শিক্ষা, সংস্কৃতি সম্পর্কে জানবে। নিজ দেশ ও সমাজের সকল স্থরের মানুষের মনেবৃত্তি, দৃষ্টিভঙ্গি সম্পর্কে অবগত হবে। বিশ্ব বাস্তবতা উপলব্ধি করে নিজ দেশের অবস্থান নির্ণয় করবে। শিক্ষায় কর্পোরেট সংস্কৃতি সম্ভবত এবিষয়টি উপেক্ষা করে একজন মানুষকে কেবল নিজের ভোগ বিলাসী জীবন যাপনে উদ্ভুদ্ধ করে থাকে। অর্থ উপার্জনই মানুষের জীবনের প্রধান কাজ। অর্থ উপার্জিত হয় কী উপায়ে তা বিবেচনার বিষয় নয়। অর্থ উপার্জনে নীতি নৈতিকতা, বিবেক বিবেচনা বোধ বিবেচিত হয়না। অর্থ উপার্জনই যেন মূল কাজ। আমাদের দেশে টেকসই উন্নয়ন নিশ্চিত করতে কেবল দক্ষ ও যোগ্য মানব সম্পদ তৈরী দিকে তাকালে চলবেনা। মননশীল, দেশ ও জাতির প্রতি প্রতিশ্রুতিশীল, সং, দেশপ্রেমিক জনগোষ্ঠী তৈরী দিকে নজর দিতে হবে। উদার, মুক্তমনা, অসাম্প্রদায়িক, বিজ্ঞান মনস্ক, আধুনিক মননশীল, সাংস্কৃতিকবান নাগরিক তৈরী করে তারপর দক্ষ ও যোগ্য মানব সম্পদ তৈরী করার কথা ভাবতে হবে। শিক্ষায় কর্পোরেট সংস্কৃতি এ ধরনের মানব সম্পদ তৈরীতে প্রতিবন্ধকতা তৈরী করে। সুতরাং কর্পোরেট সংস্কৃতি আমাদের দেশের শিক্ষা ব্যবস্থায় এক নীরব ঘাতক। প্রকৃত উন্নয়ন চাইলে এ অবস্থা থেকে উত্তরণ জরুরী। শিক্ষা ক্ষেত্রে কর্পোরেট সংস্কৃতি প্রসারের কতিপয় বৈশিষ্ট্য লক্ষ্যণীয়।

১. শিক্ষা সেবা নয়, পণ্য হিসেবে বিবেচিত।
২. শিক্ষার অধিকার কেবল মাত্র স্বচ্ছল ঘরের ছেলে মেয়েদের জন্য উন্মুক্ত।
৩. শিক্ষকের মর্যাদা ও আর্থিক স্বচ্ছলতার বিষয়টি উপেক্ষিত।
৪. শিক্ষা ব্যবস্থা দিনে দিনে মুনাফা লোভী চক্রের হাতে জিম্মি হতে চলছে।
৫. গুণগত শিক্ষা নয়, ফলাফল সর্বস্ব শিক্ষা প্রাতিষ্ঠানিক রূপ পেতে যাচ্ছে।

শিক্ষা ক্ষেত্রে এসকল বৈশিষ্ট্য আমাদের দেশ, সমাজ, কৃষ্টি ও সংস্কৃতির সাথে সামঞ্জস্যপূর্ণ নয়, দেশের উন্নয়ন ও অগ্রগতির সাথে সঙ্গতিপূর্ণ নয়। শিক্ষার প্রকৃত উন্নয়ন, প্রসার, মানব কল্যাণের সাথে সাংঘর্ষিক। অনাকাঙ্ক্ষিত হলেও শিক্ষা ক্ষেত্রে কর্পোরেট সংস্কৃতি একটি প্রতিষ্ঠিত প্রাতিষ্ঠানিক রূপ পেতে যাচ্ছে। এ সংস্কৃতি কর্পোরেট প্রক্রিয়ার বাইরের শিক্ষাকে আক্রান্ত করছে। বাইরের শিক্ষা প্রতিষ্ঠান গুলোর শিক্ষকেরা দেখতে পাচ্ছে টিউশনি করে, কোচিং বাণিজ্যের সাথে সম্পৃক্ত হয়ে অনেক অর্থ উপার্জন করা যায়। ফলে তারাও অধিক রঞ্জির আশায় টিউশনি, কোচিং এর সাথে সম্পৃক্ত হচ্ছে। স্কুলে যত্ন ও আন্তরিকতার সহিত শিক্ষা দানের বিষয়টি উপেক্ষিত হচ্ছে। শিক্ষকেরা বিদ্যালয়ের বাইরে পড়াতে আগ্রহী হচ্ছে। ফলে একজন শিক্ষকের আন্তরিকতা, মমতা ও যত্নের সহিত শিক্ষা দানের সুযোগ কেবল মাত্র স্বচ্ছল ঘরের ছেলে মেয়েরা পাচ্ছে। প্রকৃত শিক্ষা নির্বাসিত হচ্ছে। শিক্ষা বঞ্চিত, নিরক্ষর, স্বল্প আয়ের শ্রমজীবী সাধারণ মানুষের ছেলে মেয়েরা শিক্ষার অধিকার থেকে বঞ্চিত হচ্ছে এভাবেই। আর তাই সবার জন্য শিক্ষা নিশ্চিত করার কাজটি দিনে দিনে কঠিন হয়ে পড়ছে। কাঙ্ক্ষিত হারে বাড়ছেন শিক্ষার হার। কাড়ি কাড়ি অর্থ ব্যয় করে হাজারো প্রকল্প বাস্তবায়িত হচ্ছে বলা হলেও এদেশের অবহেলিত জনগোষ্ঠী শিক্ষার অধিকার থেকে বঞ্চিতই থেকে যাচ্ছে। আমাদের মত দেশে দ্রুত শিক্ষার প্রসার জরুরী। শিক্ষা ক্ষেত্রে বিভিন্ন ধরনের দুর্নীতি হয়। এটি শিক্ষা ক্ষেত্রে কর্পোরেট সংস্কৃতি বিস্তৃতিরই একটি কালো দিক। শিক্ষা ক্ষেত্রে কর্পোরেট সংস্কৃতি শিক্ষার প্রসার নয়, সংকোচিত করে। আর আমাদের সমাজে এ সংস্কৃতি প্রতিষ্ঠা মানে পুরো শিক্ষা ব্যবস্থায় এক অশনি সংকেত।

৬. গণমাধ্যমের ভূমিকা :

শিক্ষা ক্ষেত্রে কর্পোরেট সংস্কৃতি প্রতিষ্ঠিত হওয়ার পেছনে গণমাধ্যমের ভূমিকা রয়েছে। গণমাধ্যমগুলো ভালো ফলাফল করে এরকম প্রতিষ্ঠানগুলোকে এমনভাবে প্রচার করে যাতে তাদের সুনাম দেশব্যাপি ছড়িয়ে পড়ে। প্রকৃত শিক্ষার উন্নয়নে একটি প্রতিষ্ঠানে যেমন প্রতি বছর শতভাগ ফেল করা কাঙ্ক্ষিত নয় তেমনি একটি প্রতিষ্ঠানে প্রতিবছর সবাই পাশ করার বিষয়টি অস্বাভাবিক। শতভাগ জিপিএ -৫ পেলে ভালো প্রতিষ্ঠান এবং শতভাগ ফেল করলে খারাপ প্রতিষ্ঠান হিসেবে চিহ্নিত করার চেয়ে কেন একটি প্রতিষ্ঠানে বছরের পর বছর শতভাগ জিপিএ-৫ পায় এবং কেন আরেকটি প্রতিষ্ঠানে শতভাগ ফেল করে তার কারণ অনুসন্ধান করা জরুরী। আমাদের দেশের গণমাধ্যম গুলো তাদের প্রতিবেদন পর্যালোচনায় কারণ চিহ্নিত না করে ভালো ফলাফল করে এমন প্রতিষ্ঠানের সুনাম প্রচারে ব্যতিব্যস্ত থাকে।

মনে করা যাক, 'ক' নামের একটি শিক্ষা প্রতিষ্ঠানে মাধ্যমিক ও উচ্চ মাধ্যমিক পর্যায়ে শিক্ষা প্রদান করা হয়। দেশ ব্যাপি এই প্রতিষ্ঠানের সুনাম রয়েছে। ঢাকা শহরে বিভিন্ন এলাকায় এই প্রতিষ্ঠানের শাখা রয়েছে। বাংলাদেশের বিভিন্ন জেলা উপজেলা হতে শিক্ষার্থীরা এখানে পড়তে আসে। এ প্রতিষ্ঠানে শিক্ষার্থী ভর্তির প্রধান মানদণ্ড হলো আর্থিক স্বচ্ছলতা। এছাড়া প্রতি বছর ভর্তি পরিক্ষার মাধ্যমে শিক্ষার্থী ভর্তি করা হয়। ভর্তি পরিক্ষার আগে শিক্ষার্থীদের ফলাফল দেখে যাচাই বাচাই করা হয়। এ প্রতিষ্ঠান প্রতি বছরই নজর কাড়া ফলাফল করে থাকে। জেএসসি, এসএসসি ও এইচএসসি পরিক্ষার ফল প্রকাশিত হলেই এ প্রতিষ্ঠান পত্রিকার প্রধান শিরোনাম হয় প্রায় প্রতি বছরই। প্রশ্ন হলো এভাবে ফলাফল অর্জন সমর্থন যোগ্য কি না? অবশ্যই না। ভালো ফলাফল অর্জন করলেও এধরনের প্রতিষ্ঠান প্রসংশা পেতে পারেনা। গণমাধ্যমগুলো যদি তা করে তাহলে তা হবে অযৌক্তিক। এই প্রসংশা সমাজে বৈষম্য ও অস্থিরতা তৈরী করবে। এবিষয়ে গণমাধ্যমগুলোকে আরো সজাগ, সচেতন ও সতর্ক হওয়া উচিত। ধরে নেই রাঙামাটি জেলার বড়কল উপজেলার প্রত্যন্ত অঞ্চলের মাধ্যমিক পর্যায়ের একটি বিদ্যালয়ের নাম 'খ' যেখানে ৫০০ জন শিক্ষার্থী পড়াশুনা করে। এখন 'খ' স্কুলের ৫০০ জন শিক্ষার্থী যদি 'ক' স্কুলে প্রতিস্থাপন করা যায় এবং ঐ স্কুল ভালো ফলাফল করে তবেই তা প্রসংশনীয় ও সমর্থন যোগ্য। গণমাধ্যম কেবল তখনই ঐ প্রতিষ্ঠানের স্তুতি ও প্রশংসা গাইতে পারে।

যদি একটি শিক্ষা প্রতিষ্ঠানের সকল শিক্ষকের ঐকান্তিক প্রচেষ্টা, আন্তরিকতা ও দক্ষতায় দেশ ও জাতির প্রতি প্রতিশ্রুতিবদ্ধ থেকে ধারাবাহিক ভালো ফলাফল করে তাহলেই তা সমর্থন যোগ্য। কেবল সে প্রতিষ্ঠানই প্রসংশার দাবী রাখে। মনে করা যাক, একটি প্রতিষ্ঠান শিক্ষার্থী ভর্তির জন্য কোন ভর্তি পরিক্ষা গ্রহণ করেনা। স্বচ্ছল ঘরের ছেলে মেয়েদের এখানে ভর্তি হতে উদ্বুদ্ধ করেনা। ভর্তি ফি বেতনের পরিমাণও সামান্য বা স্বল্প। এখানে দরিদ্র পরিবারের ছেলে মেয়েরা পড়াশুনা করতে পারে। এমন একটি প্রতিষ্ঠান যদি ধারাবাহিক ভালো ফলাফল করে আমাদের সমাজে কেবল মাত্র এমন প্রতিষ্ঠানই সফল প্রতিষ্ঠান হিসেবে স্বীকৃতি পাওয় যৌক্তিক। এ প্রতিষ্ঠানকে অন্যান্য প্রতিষ্ঠান অনুসরণ করবে। এতে করে শিক্ষার গুণগত পরিবর্তন ও প্রকৃত উন্নয়ন সাধিত হবে। আমাদের দুর্ভাগ্য যে, কতিপয় প্রতিষ্ঠান এরকম চর্চা পরিহার করে কর্পোরেট প্রতিষ্ঠানের ন্যায় শিক্ষাকে পণ্য বানিয়ে কৃত্রিম ভাবে অথবা অনৈতিক সুবিধা নিয়ে ভালো ফলাফল অর্জন করে আসছে।

গণমাধ্যমগুলো এমন গর্হিত কাজের সমালোচনা না করে বরং তাদের গুণগান গেয়ে চলছে। শতভাগ ফেল করছে এমন প্রতিষ্ঠানের সমস্যা চিহ্নিত না করে বরং তাদের দুর্নাম রটাচ্ছে। এতে করে শিক্ষার প্রকৃত উন্নয়ন ব্যাহত হচ্ছে। শিক্ষা বাণিজ্যকরণের পথ আরো উন্মুক্ত হচ্ছে। বৈষম্য, অস্থিরতা, বিভেদ ও বিভাজন বাড়ছে। দেশের স্বার্থে, শিক্ষার হার বৃদ্ধির স্বার্থে গণমাধ্যমগুলোকে আরো দায়িত্বশীল ও যত্নশীল হওয়া জরুরী। প্রাথমিক ও মাধ্যমিক পর্যায়ে কোন প্রতিষ্ঠানে ভর্তি

পরিক্ষার মাধ্যমে শিক্ষার্থী ভর্তি করার বিষয়টি শিক্ষার জন্য সুখকর নয়। এতে কোন শুভ ফল বয়ে আনতে পারেনা। ভর্তি পরিক্ষা হবে কেবল উচ্চ শিক্ষায় প্রবেশের ক্ষেত্রে। প্রাথমিক ও মাধ্যমিক শিক্ষা প্রতিষ্ঠানে কোন ভর্তি পরিক্ষা নয় এমন একটি সংস্কৃতি আমাদের সমাজে প্রতিষ্ঠা হওয়া জরুরী। উদ্যোগও নেয়া হচ্ছে বলে প্রচারনা চালানো হচ্ছে। কিন্তু সর্বক্ষেত্রে কেন তা হচ্ছেনা? এদেশের সকল মানুষকে সুশিক্ষিত করে গড়ে তোলার মূল বাঁধা কী? এষিয়ে গণমাধ্যমগুলোর কোন পর্যবেক্ষণ খুব একটা নজরে পড়েনা।

একটি দেশের শিক্ষার গুণগত মান উন্নয়ন, শিক্ষার প্রসার তথা জ্ঞান ও ন্যায় ভিত্তিক সমাজ প্রতিষ্ঠায় শিক্ষার ভূমিকা কতটুকু হবে? শিক্ষার ধরন, দর্শন, সমস্যা, অসুবিধা, উত্তরণ, সম্ভাবনা ইত্যাদি সকল বিষয়ে গণমাধ্যমের পর্যবেক্ষণ থাকা জরুরী। একই সাথে শিক্ষার বিভিন্ন দিক পর্যালোচনা করে পর্যবেক্ষণ তুলে ধরার সুযোগ আছে। বাংলাদেশের মত দরিদ্র পীড়িত দেশে এর গুরুত্ব অনেক বেশী। বাংলাদেশকে প্রসারমান দারিদ্র্যের অভিষাপ থেকে বের করা, দেশ ব্যাপি আয় বৈষম্য কমিয়ে আনা আমাদের জন্য প্রধান চ্যালেঞ্জ। জিনি অনুপাত বেড়ে চলছে। এমন বাস্তবতায় একটি পরিচ্ছন্ন সুন্দর শিক্ষা ব্যবস্থার কোন বিকল্প নেই। এ বিষয়ে গণমাধ্যমগুলোর ভূমিকা রাখার ক্ষেত্র অনেক বড়। কিন্তু আমাদের দেশের গণমাধ্যমগুলো সে দায়িত্ব যথাযথ পালন করছে কি? প্রশ্ন আছে তাদের আন্তরিকতা, দায়িত্ববোধ ও দায়বদ্ধতা নিয়ে। গণমাধ্যমগুলো খেলার খবর, বিনোদন বা খুন খারাবি সহ নেতিবাচক খবরগুলো যেমন খুব যত্ন সহকারে গুরুত্ব দিয়ে প্রচার করে থাকে। তেমনি শিক্ষার মত জরুরী সেবা খাতের বেহাল দশা নিয়ে পর্যবেক্ষণ, পর্যালোচনার বিষয়গুলো অবহেলিত, উপেক্ষিত হচ্ছে। যেন কর্পোরেট আদলে গড়ে ওঠা শিক্ষা প্রতিষ্ঠান গুলোর সুনাম প্রচারই তাদের কাজ। শিক্ষা ক্ষেত্রে কর্পোরেট সংস্কৃতি প্রতিষ্ঠায় গণমাধ্যমের এহেন আচরণ অনেকাংশে দায়ী।

শিক্ষা বাণিজ্যিকরণ শিক্ষা প্রতিষ্ঠানের গুরুত্ব কমিয়ে দিচ্ছে। শিক্ষা বাণিজ্যিকরণের এই সংস্কৃতি একজন শিক্ষকের দেশ, সমাজ ও মানুষের প্রতি যে দায়বদ্ধতা, প্রতিশ্রুতি, অঙ্গীকার ও আন্তরিকতা থাকে তা শূণ্যে কোটায় নামিয়ে আনে। এতে করে অর্থই হয়ে ওঠে শিক্ষা প্রদানের মূল মাধ্যম। এটা সত্য যে, আগে শিক্ষকদের শিক্ষার্থীদের প্রতি যে দরদ, মমতা, আন্তরিকতা ছিল দু'একজন ব্যতিক্রম বাদে এ যুগের শিক্ষকদের মধ্যে তা দেখা যায়না। শিক্ষা বাণিজ্য শিক্ষকদের এ মহান গুণটুকু কেড়ে নিয়েছে। দেখা যাচ্ছে, প্রতিষ্ঠান নয় শিক্ষা অর্জনের মূল ভূমিকা এখন পরিবারের হাতে। প্রতিষ্ঠানের ভূমিকা এখন ক্ষীণ হয়ে যাচ্ছে এবং ক্রমাগত ক্ষয়ে যাচ্ছে। শিক্ষা প্রতিষ্ঠান গুলো যেমন সুনাম অর্জনের জন্য উঠে পড়ে লেগে যায়- অভিভাবকরাও তাদের ছেলে মেয়েদের এসব প্রতিষ্ঠানে ভর্তি করার জন্য হুমড়ি খেয়ে পড়ে। সরকার, গণমাধ্যমের সব ধরনের পৃষ্ঠপোষকতা এসকল প্রতিষ্ঠানের অনুকূলে চলে যায়। এধরনের শিক্ষা প্রতিষ্ঠানে একজন শিক্ষার্থীকে পড়াতে বছরে লক্ষ টাকা বিনিয়োগ করতে হচ্ছে। দেখা যায় এ ধরনের প্রতিষ্ঠানে ধর্ম সহ বাংলা প্রথম পত্রের মত বিষয়ে প্রাইভেট পড়তে হয়। ফলে প্রতিষ্ঠানের চাইতে শিশুদের পড়াশুনায় পরিবারের গুরুত্বই বেড়ে চলছে। শিক্ষকদের একটি অংশ ক্রমশ: বাণিজ্যিক হয়ে উঠছে। দেশ ও সমাজের জন্য এটি কোন শুভ লক্ষণ নয়। কেন হচ্ছে? এ ব্যাপারে গণমাধ্যমগুলোর কোন উৎসাহ নেই।

৭. সুপারিশ মালা :

দেশের প্রকৃত ও টেকসই উন্নয়ন নিশ্চিত করতে চাইলে প্রতিটি শিশুর শিক্ষার অধিকার এমন ভাবে নিশ্চিত করতে হবে যাতে শিক্ষা হয় সুলভ ও সহজলভ্য। আর এ জন্য প্রয়োজন একটি সুস্ব, সুন্দর, অর্থবহ, গণমুখী শিক্ষা ব্যবস্থা। প্রতিটি শিশুকে শিক্ষিত করতে সক্ষম না হলে দেশের প্রকৃত উন্নয়ন হতে পারেনা। আজ বিশ্ব ব্যাপি টেকসই উন্নয়নের যে আন্দোলন শুরু হয়েছে আমাদের দেশে তা নিশ্চিত করতে চাইলে প্রতিটি শিশুর জন্যই শিক্ষার সম অধিকার নিশ্চিত করতে হবে সবার আগে। শতভাগ শিক্ষা প্রতিষ্ঠান পাঠ্যক্রম এবং সহ পাঠ্যক্রমের মধ্য দিয়ে প্রতিটি শিশুকে সুনাগরিক হিসেবে

গড়ে তুলবে। আর এজন্য সবার আগে প্রয়োজন শিক্ষাকে কর্পোরেট সংস্কৃতির কবল থেকে মুক্ত করা। শিক্ষা ক্ষেত্রে কর্পোরেট সংস্কৃতি আমাদের অগ্রগতি, উন্নয়ন তথা সুস্থ ধারার শিক্ষা ব্যবস্থায় প্রতিবন্ধক। দেশ ও গণমানুষের স্বার্থে, উন্নয়নের স্বার্থে যে কোন মূল্যে এ সংস্কৃতি প্রতিহত করতে হবে। একটি সুন্দর, সুসম, গ্রহণযোগ্য, গণমুখী শিক্ষা ব্যবস্থা চালু করতে নিম্নলিখিত সুপারিশ গুলো উপস্থাপন করা হলো।

১. সকল বেসরকারি, স্কুল, কলেজ দ্রুততম সময়ে জাতীয়করণ করতে হবে। শিক্ষা প্রতিষ্ঠানের জন্য আলাদা বেতন কাঠামো প্রদান করতে হবে। শিক্ষক কর্মচারীদের আর্থিক ও অআর্থিক সুবিধা বাড়িয়ে তাদের মর্যাদা বাড়াতে হবে।

২. বেসরকারি উদ্যোগে শিক্ষা প্রতিষ্ঠান স্থাপন সম্পূর্ণ রূপে বন্ধ করতে হবে। শিক্ষা বাণিজ্য করে প্রচুর অর্থ বিত্তের মালিক হয়েছে তাদের তালিকা তৈরী করতে হবে। একই সাথে যে সকল শিক্ষা প্রতিষ্ঠান শিক্ষা বাণিজ্য করে চলছে তাদের তালিকা তৈরী করে ব্যবস্থা নিতে হবে। বাণিজ্যিক পণ্যের ন্যায় শিক্ষা প্রতিষ্ঠানের বিজ্ঞাপন প্রচার শতভাগ বন্ধ করতে হবে।

৩. সকল বিদ্যালয়ে অবকাঠামো সুযোগ সুবিধা সমানভাবে নিশ্চিত করতে হবে। বেতন হার, ভর্তি ফি সারা দেশে একই থাকবে।

৪. নামে বেনামে বিভিন্ন নামে শিক্ষার্থীদের কাছ থেকে অর্থ আদায়ের সংস্কৃতি বন্ধ করতে হবে। ভর্তি ফি তে কী কী বিষয় থাকবে এবং প্রতিটি ক্যাটাগরিতে কি পরিমাণ ফি থাকবে তা জাতীয় ভাবে নির্ধারণ করে দিতে হবে। প্রাথমিক ও মাধ্যমিক পর্যায়ে মাসিক বেতন আদায় সম্পূর্ণ বন্ধ করে দিতে হবে।

৫. শিক্ষা প্রতিষ্ঠান গুলোতে প্রাথমিক সমাপনী, জেএসসি, এসএসসি, এইচএসসি পরিষ্কার আগে কোচিং প্রদানের নামে কোচিং ফি আদায়ের সংস্কৃতি দেশ ব্যাপি চালু আছে। একই সাথে মডেল টেস্ট নেওয়ার নামেও ফি আদায় করা হয়। এধরনের ফি সারা দেশে যেন একই পরিমাণ হয় তা নিশ্চিত করতে হবে।

৬. শিক্ষা ক্ষেত্রে কর্পোরেট সংস্কৃতি জ্ঞান ও ন্যায় ভিত্তিক সমাজ প্রতিষ্ঠায় অন্তরায়। এ বিষয়ে মানুষকে সচেতন করার পদক্ষেপ নিতে হবে। এ বিষয়ে সরকারের বাইরে গণমাধ্যম এর বলিষ্ঠ ভূমিকা রাখার সুযোগ রয়েছে। শিক্ষায় কর্পোরেট সংস্কৃতির সুদূর প্রসারী প্রভাব এবং এর নেতিবাচক দিক সম্পর্কে পর্যবেক্ষণ, এই সংস্কৃতি থেকে পরিত্রাণের উপায় নিয়ে গণমাধ্যম বস্তুনিষ্ঠ ভূমিকা রাখতে পারে। এবিসয়ে শিক্ষাবিদ, গবেষক, জনপ্রতিনিধি সহ সকল স্থরের মানুষকে সোচ্চার হতে হবে।

৮. শেষ কথা : শিক্ষা ক্ষেত্রে কর্পোরেট সংস্কৃতি দেশ ও জাতির জন্য কোন কল্যাণ বয়ে আনতে পারেনা। কর্পোরেট সংস্কৃতির মূল কথাই হলো মুনাফা। শিক্ষার মত জরুরী সেবাকে পণ্যে পরিণত করে মুনাফা অর্জনের সংস্কৃতি পুরো শিক্ষা ব্যবস্থার জন্য এক অশনি সংকেত। প্রকৃত টেকসই উন্নয়নে যে কোন মূল্যে একটি সুন্দর ও সুস্থ ধারার শিক্ষা ব্যবস্থা চালু করতে হবে এবং একই সাথে কর্পোরেট সংস্কৃতির বিরুদ্ধে রুখে দাঁড়াতে হবে। আমাদের শিক্ষা ব্যবস্থা ক্রমান্বয়ে অস্থির ও অস্থিতিশীল হয়ে উঠছে। এ থেকে পরিত্রাণে নতুন করে সুন্দর, গোছানো, পরিচ্ছন্ন ও পরিকল্পিত শিক্ষা ব্যবস্থা প্রতিষ্ঠিত করতে হবে। সুতরাং কাল বিলম্ব না করে এখনই আমাদের এই সংস্কৃতি নিরসনে কার্যকর ব্যবস্থা নিতে হবে।

References :

1. Farashuddin, Mohammed. Education, Employment and Equity : The Bangladesh Context, BEA : SMS Kibria Memorial Lecture. BANGLADESH JOURNAL OF POLITICAL ECONOMY, Volume 26 Number 1, June 2010.
2. Marching towards Growth, Development and Equitable Society, Budget Speech, 2016-17, Ministry of Finance, Peoples Republic of Bangladesh, 02 June, 2016.
3. Internet.
4. Zaman, Jasimuz. Rural High Schools in Bangladesh : An Experiment on Quality Education, Bangladesh Education Journal, Volume-15, Number – 2, December, 2016.
৫. গণপ্রজাতন্ত্রী বাংলাদেশ সরকার : বাংলাদেশ অর্থনৈতিক সমীক্ষা, অর্থ মন্ত্রণালয়, ২০১৬ ।
৬. চক্রবর্তী, উত্তরা, যবনিকা সেরে যায়, শিক্ষা : এক নিঃশব্দ বিপ্লব, সম্পাদনায় স্বরাজ সেনগুপ্ত, রেনেসাঁস, কলকাতা, জানুয়ারি, ২০০৬ ।
৭. জাতীয় শিক্ষানীতি, ২০১০ । শিক্ষা মন্ত্রণালয়, গণপ্রজাতন্ত্রী বাংলাদেশ সরকার ।
৮. মাধ্যমিক বাংলা সাহিত্য (নবম-দশম শ্রেণি), জাতীয় শিক্ষাক্রম ও পাঠ্যপুস্তক বোর্ড, ঢাকা, অক্টোবর, ২০১৪ ।
৯. মিত্র, বিনয় : বাংলাদেশের শিক্ষাব্যবস্থা রূপ ও রীতি, ইত্যাদি গ্রন্থ প্রকাশ, ফেব্রুয়ারি, ২০১৪ ।
১০. সমকাল, ইত্তেফাক, কালের কণ্ঠ, প্রথম আলো Daily Star, DhakaTribune সহ বিভিন্ন দৈনিকের বিভিন্ন প্রতিবেদন, কলাম, ফিচার ।